



ALOKUSAUN

SUA EXELÊNSAI KAY RALA XANANA GUSMÃO NIAN

PRIMEIRU MINISTRU REPÚBLIKA DEMOKRÁTIKA TIMÓR-LESTE

**ABERTURA BA “THE ASEAN FOOTBALL FEDERATION 11TH
COUNCIL MEETING PERÍODU 2007/2011”**

1 Agostu 2009

Exelênsia, Presidente Federasaun Futebol ASEAN, Tengku Tan Sri Dato' Seri Ahmad Rithauddeen

Representantes husi Federasaun Futebol ASEAN

Ha'u nia belun, Dr. Mari Alkatiri

Ha'u nia belun, Presidente Komité Olímpiku Timor-Leste, Eng. João Carrascalão
Embaixador sira

Membrus Parlamentu Nasional

Membrus Governu

Exelênsias

Distintus Konvidadus

Senhoras no Senhores

Ho laran haksolok tebes mak ha'u mai iha ne'e atu loka "the 11th Council Meeting of the ASEAN Football Federation, período 2007/20011.

Onra boot ida mai Timór-Leste bele sai hanesan uma-na'in ba reuniaun ida ne'e ne'ebé reflete ami nia solidariedade ba Nasaun maluk sira iha ASEAN no hatudu ita hotu nia domin ba futeból.

Ha'u hakarak mós hato'o boas vindas ba maluk sira husi ASEAN Football Federation ne'ebé mai to'o Timór-Leste no hein katak imi nia reuniaun ne'e bele produtivu i ho susesu boot.

Senhoras ho Senhores

Timór-Leste Nasaun ida ne'ebé bele dehan, ema hotu gosta futeból. Ne'e mak desportu ne'ebé populár liuhotu mai ami no halo ami nia Povu gosta tebetebes.

Durante kalan barak Palásiu Governu nia oin mós nakonu ho fans futeból nian. Ne'e wainhira sira mai asisti jogu ruma iha ékran boot ne'ebé tau iha ne'ebá, hamutuk ho sira nia famílias i amigus.

Iha distritus Timór-Leste tomak, iha kampus futeból (maibe la iha manutensaun) kuaze iha fatin hotu-hotu, sai hanesan fatin sentrál iha aldeias no vilas laran, hodi haburas sentimentu komunitáriu no hanesan fatin ne'ebé ema hotu bele halibur malu.

Senhoras no Senhores

Jogus futeból fó inspirasaun, halo ema kontente no buat di'ak ida ne'ebé ami nia Povu buka – liu-liu jovens sira.

Futeból fó kontribuisaun boot atu harí comunidade ne'ebé forte iha País ida ne'e.

Timór-Leste agora iha faze desenvolvimentu ne'ebé ami bele reforsa organizaun futeból hodi loke tán oportunidades ba jerasaun joven.

Ami sei hasoru dezafius barak. Hanesan mós nesesidade atu hadi'a infra-estruturas futeból nian no mós kualifikasaun ba jestores, treinadores, árbitrus no administradores futeból nian sira

Senhoras ho Senhores

Ita presiza haré oinsá bele desenvolve klubes futeból nian iha Timór-Leste – i la'ós forma de'it ekipas futeból.

Ita presiza desenvolve ligas futeból iha Timór-Leste – i la'ós de'it torneius futeból.

Kuandu to'o ona tempu, ita presiza desenvolve liga nasional boot ida iha Nasaun tomak laran.

Ne'e la'ós buat fásil. Presiza servisu maka'as no halo planu ne'ebé di'ak.

Ita tenke reforsa jestaun futeból no desenvolve administrasaun klubes futeból nian. Ita mós tenke prepara programas futeból ba iha ita nia eskola sira hotu.

Felizmente, ita iha ona Federasaun Futeból ida ke di'ak tebes. Ita nia Federasaun ne'e harí atu bele buka oinsá ASEAN Football Federation bele apoia ita desenvolve jogus ka kompetisoens.

Senhoras no Senhores

Futeból la'ós de'it jogus – bele iha mós papél seluk hanesan halo promosaun ba amizade no solidaridade iha ita nia rejiaun laran.

Council Meeting ida ne'e hanesan ezemplu di'ak ida – halibur hamutuk ema husi nasoens sira iha rejiaun ida ne'e. Halo nune'e, hala'o ona papel promosaun ba paz, respeito no comunidade iha ita nia rejiaun.

Ami sai hanesan uma-na'in ba Council Meeting ida ne'e, konserteza atu hatudu ami nia kometimentu katak hakarak halo parte comunidade ASEAN tomak.

Hanesan parte husi Sudoeste Aziátiku, ami mós kompartilha objetivus ASEAN nian atu aselera kresimentu ekonómiku, desenvolvimento sosiál no kulturál ho paz i estabilidade rejionál.

Nune'e mak Timór-Leste servisu ativu duni atu bele adere lais liu ba ASEAN.

Senhoras no Senhores

Ha'u hato'o tan fali ha'u nia boas vindas ba imi.

Povu ida ne'e gosta tebes futebol maibé ami tenke servisu maka'as liután atu reforsa kompetisoens iha Timór-Leste. Ha'u hein katak ita bele halo buat hirak ne'e maibé tenke servisu hamutuk ho amizade no solidariedade.

Ha'u dezeja suksesu boot ba Council Meeting ida ne'e.

Espera mós katak durante imi iha ne'e bele aproveita hodi goza uitoan beleza Rai ida ne'e nian no Povu nia ospitalidade.

Ha'u aproveita oportunidade ne'e atu deklara katak Meeting ida ne'e ofisialmente loke!

Obrigadu barak!